



## ҚАЗАҚ-ИРАН ҚАТЫНАСЫ НЫҒАЯ ТҮСЕДІ

Мемлекет басшысы Иран Ислам Республикасының жаңадан сайланған Президенті Масуд Пезешкианмен телефон арқылы сөйлесіп, жеңісімен құттықтап, жауапты мемлекеттік қызметіне табыс тіледі.

Әнгімелесу барысында екі ел басшылары казак-иран қатынастарын одан әрі нығайтуға өзара ниетті екенін растады. Тараптар сауда-экономикалық, көлік-логистикалық және мәдени-гуманитарлық салалардағы ынтымақтастықтың қазіргі жай-күйі мен даму перспективаларын талқылады. Сондай-ақ өңірлік және халықаралық күн тәртібіндегі өзекті мәселелер жөнінде пікір алмасты.

## ТЕРЕҢ БАТЫРАДЫ, АБАЙЛАУ КЕРЕК...



Атырау облысында шомылуға қауіпті 70 орын бар, оның 17-сі – Атырау қаласында, 10-ы – Индер қаласында, 19-ы – Махамбетте, екеуі – Құрманғазыда, жетеуі – Жылыойда, 15-і – Қызылқоға аудандарында орналасқан. Мұнда 238 тыйым салу белгісі мен тоғыз ақпараттық стенд орнатылған. Арнайы рейдтер жүргізіліп, жағалауда жүрген, суға түсіп жатқан адамдарға ескертулер де берілген. Бірақ азаматтар шомылу маусымының не себепті ашылмай отырғандығын, ашық су айдындарында тасқыннан кейін суға түсудің қаупі жоғары екенін сезіне бермейді.

» 5

### АЛТАЙ ЖЫРШЫСЫ



6  
 БЕТ

Қазақ әдебиетінде өзіне лайық орнын ойып алған Асқар Алтай шығармашылығы көзі қарақты, ойлы оқырманның көз алдында. Жазушының қай шығармасын алсақ та, Алтайдың өткен тарихын, бүгінгі кескін-келбетін, бітім-болмысын, яғни шежіресін толғайды.

### 20 АСПАПТЫҢ ҚҰЛАҒЫНДА ОЙНАЙДЫ



8  
 БЕТ

Бір өзі жиырма музыкалық аспапта ойнайтын атыраулық Абзал Сиғуатоллаұлы небәрі 24 жаста. Абзалдың жиырма аспапта ойнаған шағын бейнеклипі қазір әлеуметтік желіде кең таралып жатыр. Бір не үш емес, жиырма аспапты меңгеріп алған Абзал – қарапайым ауылдан шыққан талант.

### ЖАРЛЫҚ

#### П.К. КЕСОГЛУДІ І ДӘРЕЖЕЛІ «БАРЫС» ОРДЕНІМЕН НАГРАДТАУ ТУРАЛЫ

2024 жылғы 22 шілде

#### ҚАУЛЫ ЕТЕМІН:

1. Мәдениет пен эстрада өнерін дамытуға қосқан елеулі үлесі үшін Пантелей Константинович Кесоглу І дәрежелі «Барыс» орденімен наградталсын.
2. Осы Жарлық кол қойылған күнінен бастап қолданысқа енгізіледі.

Қазақстан Республикасының  
 Президенті Қ.ТОҚАЕВ

## ТАРИХТАН СЫР ШЕРТКЕН ЖӘДІГЕРЛЕР



Археологтар Шет ауданындағы Талды тарихи-археологиялық паркінің аумағындағы қорғандардың бірін қазу кезінде біздің заманымызға дейінгі 2,5 мың жыл бұрынғы дәуірге жататын бірегей жәдігер тапқан болатын. Олар іші ат әбзелдеріне толған қазанды зерттеу көптеген құнды мәлімет беретініне сенімді. Иілген үш аяқты, мыстан құйылған жәдігер – Орталық Қазақстан өңірінен табылған алғашқы қазан. Ол хан ордасынан 200 метр қашықтықта, қорғандардың ішінде емес, бөлек көмілген екен.

» 7

## ҚОРҚОРДЫҢ ҚОРЛЫҒЫНАН ҚАЛАЙ ҚҰТЫЛАМЫЗ?



Қоғамдық орындарда қорқор тартуға тыйым 2020 жылы күшіне енді. Алайда бұл тыйым сақталмайды. Мейрамхана, түнгі клуб, барларда жазғы террасада да, ғимараттың ішінде де жұрт қорқорды қорқылдатып жатады. Денсаулық сақтау министрлігінің түсіндіруінше, тыйымның аяқасты болуына оны бұзғаны үшін салынатын айыппұлдың тым аздығы себеп. Бұған қоса, айыппұл бизнес нысанына емес, шегушіге салынады. Сондықтан Үкімет вейпердің ізімен, енді кальяндарды әкелуге және сатуға толық тыйым салу мәселесін қарастырмақ.

(Жалғасы 4-бетте)



## ҚҰРЫЛЫС ЖҰМЫСТАРЫН ЖЕДЕЛДЕТУ ҚАЖЕТ

**Премьер-Министр Олжас Бектенов жұмыс сапарымен еліміздің батысына барды. Басты мақсат – Мемлекет басшысының су тасқынынан зардап шеккен азаматтарды баспанамен қамтамасыз ету жөніндегі тапсырмаларының орындалу барысын тексеру.**

Батыс Қазақстан облысында Үкімет басшысы Теректі ауданындағы Подступное ауылында, Деркөл кентінде және Орал қаласындағы «Жұлдыз» ықшамауданында болды, мұнда жалпы саны 400-ге жуық тұрғын үй құрылысы жүргізілуде. Тексеру барысында алдағы суық мезгілді ескере отырып, жұмыс қарқыны мен тұрғын үй инфрақұрылымының қоныстануға дайындығын қамтамасыз ету мерзімдері бағаланды.

Теректі ауданы Подступное ауылында 3 бөлмелі 106 тұрғын үйдің құрылысы жүріп жатыр. Жұмыс биылғы мамыр айында басталған болатын. Бүгінде іргетасын құю жұмысы толығымен аяқталды, 43 үйдің қабырғасы тұрғызылып жатыр, 62 үйдің шатыры жабылуда. Нысандарға 8 мердігер ұйым, шамамен 330 адам және 56 техника жұмылдырылған. Тамыз айының ортасында пайдалануға беру көзделген.

Деркөл кентінде 103 тұрғын үй жана учаскелерде салынып жатыр. Қазір іргетас құю жұмыстары толығымен аяқталды, 24 нысанда ішкі әрлеу жүргізіліп жатыр. Оған 5 мердігер ұйым жұмылдырылды. Жұмыс биылғы қыркүйек айында аяқталады деп жоспарланған.

Орал қаласының «Жұлдыз» ықшамауданында 191 нысан жана жерде салынып жатыр. Тұрғын үйлерді уақыттылы тапсыру үшін 17 мердігер мекеме жұмысқа тартылды. Бүгінде барлық үйдің іргетасы құйылған, 178 үйдің қабырғасы қалануда, 49 нысанның шатыры жабылып жатыр.

Премьер-Министр су тасқынынан зардап шеккен тұрғындарды жана баспанамен уақыттылы

Сондай-ақ жобала инженерлік желілерді жүргізу көзделген.

Әлеуметтік инфрақұрылымға келсек, ауылда қазір жөндеу жұмыстары жүргізіліп жатқан 400 орынға арналған мектеп бар. Сонымен қатар жана үйлердің болашақ тұрғындары үшін балалар алаңы салынады.

«Жұмыста кемшіліктер болмауы керек. Мемлекет басшысы үйлердің тиісті сапасын қамтамасыз етуді тапсырды. Тұрғын үйлерді барлық инженерлік желіге бірден қосу қажет. Бұл ретте жол инфрақұрылымы мен әлеуметтік нысандарды тезірек қалпына келтіруді қамтамасыз ету маңызды. Ауруханалар, мектептер мен балабақшалар сапа мен техникалық жаракандырудың заманауи талаптарын ескере отырып салынуы керек», – деп атап өтті Олжас Бектенов.

Сондай-ақ Үкімет басшысы Олжас Бектенов Ақтөбе облысына барып, су тасқынынан зардап шеккен Темір және Ойыл аудандарының тұрғындары үшін салынып жатқан жана үйлер құрылысының қарқынымен танысты.

Ойыл ауданы Қаратал ауылында салынып жатқан үйлердің бұған дейін жоспардан 15-25 күнге кешігуі туралы мәселе көтерілген болатын. Елді мекенде су тасқыны салдарынан 210 ғимарат зақымданған, оларды тексеру жұмыстары толығымен аяқталды. Ауыл тұрғындары үшін қайталама нарықтан 60 үй сатып алынды. Жөндеуге жататын 18 нысан бойынша тиісті төлемдер жүргізілді. Ауылда тұруға жарамсыз деп танылған үйлердің орнына 132 тұрғын үй салынып жатыр.



қамтамасыз ету үшін жұмыс барысын қатан бақылау қажеттігін атап өтті.

«Өңір қажетті қарқын алуы керек. Сапалы, қауіпсіз және жайлы тұрғын үймен қамтамасыз ету міндеті – Үкіметтің негізгі басымдығы. Барлық құрылыс нысандарында бақылауды күшейту қажет. Облыста баспаналарын күтіп, уақытша жерлерде тұрып жатқан отбасы қатары көп. Құрылыс жұмыстарын жеделдетіп, 2-3 ауысымдық жұмыс кестесіне көшу қажет. Толық жұмылдыруды қамтамасыз етуді тапсырамын», – деп Олжас Бектенов.

Сонымен қатар инженерлік желілерді, жол және әлеуметтік инфрақұрылымды қалпына келтіру бойынша тапсырмалар берілді. Салынып жатқан аудандарда ілеспе инфрақұрылым мен абааттандыруды алдын ала қарастыру қажет. Жана тұрғын аудандардың жанында 1 500 орынға арналған «Жайлы мектептердің» құрылысы жүргізілуде. Облыс әкімдігінің мәліметінше, жұмыстар биылғы күзде аяқталады.

Бұдан соң Премьер-Министр Батыс Қазақстан облысында су тасқыны салдарынан зардап шеккен, шалғайда орналасқан Қаратөбе ауданы Қоржын ауылына барды. Мұнда қираған үйлердің орнына бір пәтерлі 90 тұрғын үй салынып жатыр. Іргетас құрылысы бойынша жұмыс толығымен аяқталған. Бүгінде 34 үйдің қабырғасы тұрғызылып, 56 үйдің төбесі жабылып жатыр. Нысандардың жалпы дайындығы 50%-ға жетеді.

Бұған дейін Премьер-Министрдің тапсырмасы бойынша учаскеде жұмыс істейтіндердің саны 30%-ға артқан болатын. Қазіргі уақытта нысандарда 288 адам жұмыс істейді. Жұмыс кестеге сәйкес жүргізілуде.

Жобаға сәйкес үйлерде қалыңдығы 400 мм таспалы іргетас қарастырылған, іргетастың түбінен биіктігі 1500 мм болады. Қабырғаларды тұрғызуға қапталған силикатты қызыл кірпіш, керамицитті блок, минералмақта плитасы қолданылуда.

## ЖАҢА МЕКТЕПТІҢ ЖАЙ-КҮЙІМЕН ТАНЫСТЫ

**Сенатор Сұлтанбек Мәкежанов Алматы облысындағы қазіргі заманғы мектеп құрылысымен танысты.**

Биыл Алматы облысындағы Есік қаласында 900 оқушыға арналған жалпы білім беретін жана мектеп ашылады. Сенат депутаты Сұлтанбек Мәкежанов осы мектептің құрылысымен танысты. Бұл былтыр Ақмола облысындағы Қосшы қаласында ашылған мектептен кейінгі қазіргі заманғы стандарттар бойынша осы үлгіде салынып жатқан екінші білім беру мекемесі болып отыр.

«Алматы қаласында да осындай мектеп салу жоспарланып отыр. Осыған байланысты біз бүгін тәжірибе алмасу үшін Алматы қаласы Құрылыс басқармасының басшысы мен Жобалау институтының басшыларын да осы нысанға шақырдық. Мұндай мектептердегі сыныптардың ауданы 60-62 шаршы метрді құрайды, бұл балалардың білім беру процесіне қолайлы жағдай туғызады. Болашақта қазақстандық мектептер осындай болуға тиіс. Спорт алаңдары да осы стандарттарға сай болуы керек», – деп сенатор.

Депутат сапар барысында Алматы қаласындағы жол кептелісі мәселесіне де назар аударды. Ол қаланың ең көп жүретін учаскелерінің бірі Құлжа трактісіндегі жолды кеңейту барысымен танысты.



Депутатқа жолды кеңейтіп, жолақтар санын көбейту жұмыстары биылғы жылдың I қыркүйегіне дейін аяқталатыны туралы хабарланды. Құлжа трактісінде осыған дейін 4 жолақ болса, енді әр бағытта 3-ке дейін көбейтіледі және жалпы алғанда 6 жолаққа кеңейтілетін болады. Бұл қаланың шығысындағы кептелісті деуір азайтады.



## БЕС АДАМНЫҢ ӨМІРІН АРАШАЛАП ҚАЛДЫ

**Елордадағы University Medical Center клиникаларында донорлық ағзаны транспланттау бойынша ота сәтті жүргізілді. Осылайша, дәрігерлер донор кезегінде тұрған бес адамның өмірін сақтап қалды.**

Донор инсульт алған 44 жастағы әйел болған, дәрігерлер консилиумы марқұмның миы қызметін тоқтатқанын (өлгенін) растаған. Оның туыстары ағза донорлығына келісім берген.

Марқұмның жүрегін UMC жүрек орталығында медициналық топ 43 жастағы пациентке транспланттады. Науқасқа бұрын механикалық қан айналымын қолдау құрылғысы (LVAD) имплантталған, соның арқасында өмір сүріп келген.

Екінші пациентке өкпе трансплантациясы жасалды.

UMC Ана мен бала орталығында 15 жастағы қызға бүйректі транспланттау жүргізілді.

Сондай-ақ екінші донорлық бүйрек пен бауыр Астана қаласының Ұлттық ғылыми онкологиялық орталығында пациенттерге трансплантталды. Барлық реципиенттердің жағдайы қанағаттанарлық, олар мамандардың бақылауымен оналтудан өтеді.

Донорлық ағзаларды транспланттау – ең күрделі операциялардың бірі, алайда отандық мамандар оны сәтті өткізді.

Айта кетейік, жүрек пен өкпені транспланттау қайтыс болған донордан мидың өлімі расталған кезде ғана жүзеге асырылады. Алайда одан әрі процесс көбінесе донордың жақын туыстарының шешіміне байланысты.

## ОТАНДЫҚ ИНТЕРНЕТ ОЗЫП ТҮР

**Еуразиялық даму банкі еліміздегі цифрлық қызметтердің даму қарқынын саралап көрді. ЕАЭО-ның басқа елдеріне қарағанда біздегі интернет халықтың көп бөлігіне қолжетімді екені анықталып отыр.**

Есепке сәйкес, Қазақстанда азаматтардың 90,9 пайызы бірден интернетке қол жеткізе алады. Ресейде бұл көрсеткіш небәрі 88,2%-ды, ал Беларусьте 86,9%-ды құраған. Түрікменстандағы көрсеткіш 38,2%-ға тең.

Интернет жылдамдығы бойынша Қазақстан ЕАЭО елдерінің ішінде Өзбекстаннан кейінгі төртінші орынға тұрақтаған. Армения, Түрікменстан және Тәжікстанда ең төменгі көрсеткіштер тіркелген.

Дегенмен Қазақстандағы электрондық Үкімет рейтингі аймақтағы басқа елдермен салыстырғанда әлдеқайда жоғары. Әлемдік кестеде Ресейден 14 ұпайға озып, 28-орынға жайғасқан (42-орын). Одан кейін Армения (64), Өзбекстан (69), Қырғызстан (81), Беларусь, Тәжікстан (129) және Түрікменстан (137) орналасқан.

Банк сарапшылары 2028 жылға қарай Орталық Азиядағы интернетті қолданудың орташа денгейі 76 пайызды құрап, пайдаланушылар саны 11 миллион адамға өседі деп болжап отыр.













